



Broj/Број: 01,02,03,03/11-05-522/08
Sarajevo/Сарајево: 15.12.2008.godine

**Izveštaj s Regionalnog okruglog stola:
"Odnos između parlamenta i javnih revizorskih institucija"
Skoplje, 12. i 13. decembra, 2008.godine**

U Skoplju je, 12. i 13. decembra 2008., u organizaciji OSCE-a, održan Regionalni okrugli sto "Odnos između parlamenta i javnih revizorskih institucija".

Na ovom skupu učestvovali su predstavnici parlamenta i državnih revizorskih institucija iz: Albanije, Bosne i Hercegovine, Crne Gore, Makedonije, Slovenije, Srbije, Kosova, kao i eksperti iz zemalja članica EU.

U radu okruglog stola učestvovala je i delegacija Parlamentarne skupštine BiH u kojoj su bili: **Sadik Bahtić**, predsjedavajući Komisije za finansije i budžet Predstavničkog doma PSBiH, **Lazar Prodanović**, zamjenik predsjedavajućeg Komisije, **Velimir Jukić**, zamjenik predsjedavajućeg Komisije, i Jelena Rajaković, sekretar stalne delegacije PSBiH u PSOSCE-a.

U radu ovog skupa učestvovala je i **Milenko Šego**, generalni revizor u Uredu za reviziju finansijskog poslovanja institucija BiH.

Uvodno obraćanje imala je gđa Svetlana Jakimovska, zamjenik predsjednika Skupštine Republike Makedonije, koja je tom prilikom istakla značaj parlamentarne saradnje zemalja u regionu i pozdravila razmjenu iskustava u oblasti kontrole javnih finansija.

Učesnici su diskutirali o razlikama i sličnostima u procesu parlamentarnog nadzora nad izvršenjem budžeta u njihovim zemljama i naglasili da je nadzor parlamenata u tom segmentu od najveće važnosti za transparentnost, odgovornost i istinsku demokratičnost državnih administrativnih struktura.

Parlamentarci iz različitih zemalja govorili su o budžetskim procedurama i njihovim rezultatima u praksi, te mogućnosti poboljšanja zakonodavstva u oblasti javnih finansija.

Razmatrana je uloga državnih ureda za reviziju kao instrumenta za kontrolu budžeta, te odnosi parlamenata s njihovim komisijama za budžet.

Učesnicima je prezentirano viđenje ustavnih garancija za nadzor nad izvršenjem budžeta i prava parlamenata u tom procesu, kao i koncept budžetskog ciklusa koji se odnosi na: način na koji komisije za budžet učestvuju u planiranju godišnjeg budžeta, nadzor nad izvršenjem budžeta vlade i odobravanje budžetskog izvještaja o troškovima za proteklu godinu.

Eksperti iz Holandije i Belgije Gerrit de Jong, član Odbora Ureda za reviziju Holandije, i Franz Wascotte, član Odbora za reviziju Belgije, iznijeli su iskustva svojih zemalja o pitanju javnih ureda za reviziju i pitanju njihovog odnosa s parlamentima. Oni su kao glavna očekivanja revizorskih institucija od parlamenata istakli da revizorske institucije moraju biti potpuno nezavisne (što treba biti osigurano ustavom i zakonima), da nema političkog miješanja u rad revizorskih institucija, i da nove vlade po dolasku na vlast ne bi smjele mijenjati generalnog revizora.

Tokom diskusije, članovi parlamenta zemalja učesnica govorili su i o uključivanju komisija za budžet u aktivnosti planiranja javne revizije, te o saradnji parlamenta i ureda za reviziju u borbi protiv korupcije. Razmijenjena su iskustva o najboljoj praksi rada javnih ureda za reviziju u Jugoistočnoj Evropi, o revizorskim standardima i međunarodnim zahtjevima i pouzdanosti finansijskih procesa. Diskusija je vođena i o odnosu javnih ureda za reviziju i medija, javnih institucija i javnosti uopće, a posljednji dio okruglog stola bio je posvećen temi proširenja EU i pitanju da li su odgovarajuće izmjene zakona o uredima za reviziju i Jugoistočnoj Evropi preduslov za priključenje EU.

Sadik Bahtić, predsjedavajući Komisije za finansije i budžet Predstavničkog doma PSBiH, istakao je dobru saradnju Komisije i Ureda za reviziju finansijskog poslovanja institucija BiH, i dodao da, iako je Ured za reviziju formiran 2001. godine, on u svom radu pokazuje odlične rezultate.

Bahtić je još rekao da je u radu Komisije za finansije i budžet Parlamentarne skupštine BiH najdjelotvorniji metod javnog salušanja na koje se pozivaju sve institucije koje nemaju pozitivno mišljenje revizije.

On je naglasio da Ured za reviziju ima podršku Komisije za finansije i budžet Predstavničkog doma PSBiH i da Bosni i Hercegovini ne treba revizija koja bi bila samo formalna već revizija koja daje rezultate, koja je djelotvorna te da javnost želi i treba da zna kako se troše javna sredstva.

Na kraju svog izlaganja Bahtić se, u svoje ime i u ime delegacije PSBiH, zahvalio organizatorima tog skupa, ističući da je ovakva razmjena iskustava vrlo značajna za zemlje Jugoistočne Evrope.

Velimir Jukić, zamjenik predsjedavajućeg Komisije za finansije i budžet Predstavničkog doma PSBiH, istakao je ulogu koju parlament i ured za reviziju imaju u kontroli javnih sredstava.

Govoreći o značaju poštovanja principa sveobuhvatnosti, odnosno o potrebi jednakog tretmana svih institucija od strane državne revizorske institucije, Jukić je istakao problem revizije korisnika općinskih budžeta u BiH, dodajući da se ta kontrola ne vrši redovno i da neki subjekti nisu bili predmet revizije više od 10 godina.

Milenko Šego, generalni revizor Ureda za reviziju finansijskog poslovanja institucija BiH, govoreći o praksi revizije u BiH, istakao je da je revizija u BiH utemeljena 2000. godine, da postoje tri ureda za reviziju (BiH, RS i FBiH) i jedno zajedničko tijelo- Koordinacioni odbor. Oblast revizije uređena je u BiH novim zakonom 2006. godine i njime je riješen problem nezavisnosti državne revizorske institucije. Njime je generalni revizor ovlašten da donosi odluku o izvršenju revizije kao i sve interne akte.

On je govorio i o potrebi prezentiranja izvještaja javnosti, odnosno parlamentu i zaključio da je revizija proces koji je neodvojiv od pojma demokratije, te da se razvija uporedo s razvojem demokratije u našoj zemlji.

Izvještaj pripremila

Jelena Rajaković

Sektor
za međunarodne odnose i protokol

***Izvještaj odobrio g. Sadik Bahtić, predsjedavajući Komisije za finansije i budžet Predstavničkog doma PSBiH**